

**Ed.**

## **27. Frumvarp**

til laga um bæjarstjórn í Hafnarfirði.

Flutningsm.: Björn Kristjánsson.

### 1. gr.

Hafnarfjörður skal vera lögsagnarumdæmi út af fyrir sig með kaupstaðarrjettindum. Takmörk kaupstaðarsvæðisins eru þessi: Bein lína úr »Bálaklökk«, við vesturenda Skerseyrarmalar, í veginn frá Hafnarfirði til Reykjavíkur, þar sem hann fer lækkandi ofan af norðurbrún hraunsins. Þaðan eftir nyrðri brún Hafnarfjarðarhrauns, þar til kemur móts við austurhorn Hraunsholtstúns. Þaðan beina stefnu neðanverðan Kaplakrika í vörðu á holtinu fyrir ofan Jófríðarstaði þaðan yfir Fuglastapaþúfu efri, beina leið í sjó fram. Kaupstaðurinn skal skyldur að setja nægilega mörg varanleg merki, er sýni greinilega takmörk landsins, og halda þeim við.

Sýslumaðurinn í Gullbringu- og Kjósarsýslu, skal jafnframt vera bæjarfógeti kaupstaðarins.

### 2. gr.

Málefnum kaupstaðarins skal stjórnað af bæjarstjórn. Í henni eru kosnir bæjarfulltrúar auk bæjarstjóra, sem er oddviti hennar. Bæjarstjóri skal kósinn af bæjarstjórn til 4 ára í senn og skal hann launaður af bæjarsjóði.

Bæjarstjóri hefir því aðeins atkvæðisrjett á fundum, að hann sje jafnframt bæjarfulltrúi.

### 3. gr.

Bæjarstjóri hefir á hendi framkvæmd á ákvörðunum þeim, er bæjarstjórn gerir, og í bæjarmálum yfir höfuð. Þó má bæjarstjórnin fela einum, eða fleiri mönnum úr sínum flokki, að framkvæma einstök bæjarstörf eftir reglum, sem hún setur. Allir bæjarfulltrúar eru skyldir að taka að sjer þau sjerstöku bæjarstörf, sem bæjarstjórnin þannig felur þeim.

#### 4. gr.

Bæjarstjóri stjórnar umræðum á fundum, og sjer um, að það, sem ályktað er, sje rjett ritað í gerðbókina.

Fundi skal bæjarstjórnin halda í heyranda hljóði. Einstök mál má þó ræða innan luktra dyra, þegar bæjarstjórnin ályktar það.

Til þess að lögmæt ályktun sje gerð, verður, auk bæjarstjóra, að minsta-kosti helmingur bæjarfulltrúa að vera á fundi. Atkvæðafjöldi skal ávalt ráða. Sjeu jöfn atkvæði með og móti, fellur atkvæðisefnið, nema við kosningar, því þá ræður hlutkesti.

Það skal kunnbert bæjarbúum, hvar og hvenær bæjarstjórnin heldur fundi, sem almennir eru. Aukafundi má halda, þegar bæjarstjóra þykir nauðsyn-legi, eða að minsta kosti helmingur bæjarfulltrúa æskir þess.

Bæjarstjóri skal á undan fundum, að svo miklu leyti, sem unt er, skýra bæjarfulltrúum frá, hver málefni komi fyrir. Allir þeir bæjarfulltrúar, sem eru á fundi, skulu rita nöfn sín undir gerðarbókina við fundarlok, og á sjerhver í bæjarstjórninni rjett á að fá ágreiningsatkvæði sitt stuttlega bókað.

Bæjarstjórn setur sjálf fundarsköp sín, en hlutadeigandi ráðuneyti samþykkir.

#### 5. gr.

Virðist bæjarstjóra ákvarðanir bæjarstjórnar ganga út yfir valdsvið hennar, eða ef ákvörðun er gagnstæð lögum, eða skaðleg fyrir kaupstaðinn, eða hún miðar til að færast undan skyldum þeim, er á kaupstaðnum hvíla, má bæjarstjóri fella ályktunina úr gildi að sinni, með því að rita álit sitt í gerðabókina. Um þetta skal hann, svo fljótt sem verða má, senda ríkisstjórninni skýrslu, en hún leggur úrskurð sinn á málið. Eftirrit af skýrslu bæjarstjóra skal jafnframt senda bæjarstjórninni, svo að hún geti gert athugasemdir við hana, áður en hún fer til ríkisstjórnarinnar.

#### 6. gr.

Í öllum þeim málum, sem snerta uppeldi og uppfræðing barna, hefir formaður barnaskólanefndar sæti og atkvæðisrjett á bæjarstjórnarfundum.

#### 7. gr.

Bæjarstjórnin kýs 4 menn til þess að vera í byggingarnefnd fyrir kaupstaðinn, ásamt bæjarstjóra og slökkviliðsstjóra. Skulu tveir þessara manna kosnir úr flokki bæjarfulltrúanna.

#### 8. gr.

Peir, sem kosnir eru utan bæjarstjórnar til að taka sæti í byggingarnefnd og hafnarnefnd kaupstaðarins, skulu skyldir að taka á móti kosningu, þó gilda sömu synjunarástæður og sama starfstímatakmörkun fyrir þá og fyrir bæjarfulltrúa, samkvæmt lögum.

#### 9. gr.

Með byggingarsamþykt, sem bæjarstjórnin semur fyrir kaupstaðinn, og stjórnarráðið staðfestir, má fella byggingarnefnd að annast byggingarmálefni kaupstaðarins undir yfirstjórn bæjarstjórnar. Í byggingarsamþyktina má

setja fyllri ákvæði um byggingarmál kaupstaðarins en þá er í lögum, ákveða sektir fyrir brot og setja reglur um greiðslu kostnaðar þess, sem af ákvæðum byggingarsamþykktarinnar leiðir; svo má og ákveða hæfileg gjöld fyrir leyfi þau, sem bæjarstjórn eða byggingarnefnd veitir. — Nú er byggingarfulltrúi skipaður samkvæmt byggingarsamþykkt, og má þá ákveða hæfileg gjöld fyrir þau störf hans, sem hann leysir af hendi sem byggingarfulltrúi í þarfir einstakra manna, eftir beiðni þeirra. Gjöld fyrir byggingarleyfi og störf fyrir einstaka menn skulu hafa lögtaksrjett, og renna þau í bæjarsjóðinn. Ef lóðareiganda þykir rjetti sínum hallað með úrskurði bæjarstjórnar eða byggingarnefndar í byggingarmáli, má hann skjóta honum til stjórnarráðsins.

#### 10. gr.

Bæjarstjórnin kýs 2 eða 4 menn til að sitja í hafnarnefnd utan bæjarstjóra, og skulu eigi færri en 2 þeirra kosnir úr flokki bæjarfulltrúa.

#### 11. gr.

Með hafnarreglugerð, er stjórnarráðið gefur út fyrir kaupstaðinn, eftir tillögum bæjarstjórnar, má fela hafnarnefnd að annast hafnarmálefni kaupstaðarins, undir yfirstjórn bæjarstjórnar. Í hafnarreglugerðina má setja ákvæði um lögreglu á höfninni og um notkun hennar og mannvirkja; svo má og ákveða þar gjöld til hafnarsjóðs fyrir notkun hafnarinnar og hafnarmannvirkja og sektir fyrir brot allt að 400 kr., er renna í sama sjóð.

#### 12. gr.

Bæjarstjórn kýs bæjargjaldkera og veitir honum árlega þóknun. Starf hans er uppsegjanlegt með 6 mánaða fyrirvara af beggja hálfu til 1. júlí ár hvert

#### 13. gr.

Bæjarstjórn skipar embættismenn eða sýslunarmenn bæjarins, og veitir þeim lausn. Lögregluþjóna og næturverði skipar bæjarstjórnin eftir tillögu bæjarfógeta, en hann getur veitt þeim lausn án samþykkis bæjarstjórnar.

#### 14. gr.

Fje það, sem útbeimtist til þess að standast útgjöld kaupstaðarins til bæjarparfa, skal að svo miklu leyti, sem sjerstakar tekjur kaupstaðarins ekki hrökkva til, fengnar með því, að leggja útsvör á íbúa bæjarins, á atvinnu, sem stunduð er í bænum, á bátum eða skipum, sem gerð eru út frá bænum, og á stofnanir og arðsöm fyrirtæki.

#### 15. gr.

Bæjarstjórn og sjerstaklega bæjarstjóri skal hafa nákvæmar gætur á fjárstjórn og fjárgæslu kaupstaðarins, og sjá um, að skattar og aðrar tekjur sjeu rjett heimtar og í tækan tíma, ennfremur gæta þess, að geymt sje á tryggum stað, og eftir atvikum ávaxtað fje bæjarins, þangað til á því þarf að halda til þess að borga útgjöld hans. Bæjarstjórnin ber ábyrgð á innstæðum og öðrum eignum kaupstaðarins.

16. gr.

Fjehirðir skal skyldur til að gefa bæjarstjórninni nákvæma sjóðskýrslu mánaðarlega eða þegar bæjarstjórn óskar þess, er sýni bæði, hvað goldist hefir í bæjarsjóð og hvað úr honum hafi verið borgað. Eigi má fjehirðir greiða neitt úr bæjarsjóði nema eftir ávísun frá bæjarstjórninni. Allar ávísanir skulu vera undirritaðar af bæjarstjóra og minst 1 bæjarfulltrúa, sem hefir með þau mál að gera, sem greiðslan kemur við.

17. gr.

Fyrir opinber uppboðsþing eða útboð, sem bærinn lætur halda í sínar þágur, svo sem á vegavinnu, á því að útvega vinnu og varning í þarfir bæjarins o. s. frv., skal ekki goldið neitt.

18. gr.

Bæjarstjórninni er skylt að útvega og láta ríkisstjórninni í tje skýrslur þær, er hún kann að æskja, svo sem um fólkstal, skepnuhald og annað ástand kaupstaðarins.

19. gr.

Við lok hvers reikningsárs skal fjehirðir semja reikning yfir tekjur og gjöld kaupstaðarins, fyrir hið umliðna ár, og senda hann bæjarstjórn eigi síðar en í lok febrúarmánaðar ár hvert. Reikningurinn skal liggja bæjarbúum til sýnis frá 1. til 15. mars á skrifstofu bæjarstjóra. Skal reikningurinn síðan endurskoðaður af 2 mönnum, sem bæjarstjórn kys til 3ja ára í senn. Endurskoðendur hafa aðgang að bókum og sjóði bæjarins hjá fjehirði, er þeim þykir þörf að gera athugasemdir, og er endurskoðendum skylt að yfirfara og bera saman dagbók, sjóðsbók og kassa gjaldkera, og einnig athuga heimildir fyrir útborgunum eigi sjaldnar en ársfjórðungslega. Endurskoðun bæjarreikninganna skal lokið fyrir 15. maí ár hvert. Að fengnum svörum fjehirðis við athugasemdum endurskoðunarmanna, skal svo reikningurinn lagður fyrir bæjarstjórn, ásamt athugasemdum endurskoðunarmanna og svörum fjehirðis, og leggur bæjarstjórn úrskurð sinn á reikninginn, og veitir síðan kvittun fyrir reikningshaldinu, samkvæmt honum. Þegar búið er að samþykkja reikninginn eða úrskurða hann, má eftir ákvörðun bæjarstjórnar, birta á prenti ágríp af honum, er bæjarstjóri semur, og skulu þá í ágrípi því greind öll aðalatriði í tekjum og gjöldum kaupstaðarins.

20. gr.

Innan loka júlímánaðar ár hvert, skal senda ríkisstjórninni reikning yfir hið umliðna ár með athugasemdum endurskoðunarmanna og úrskurði bæjarstjórnarinnar á þeim.

21. gr.

Með lögum þessum eru úr gildi numin lög nr. 75, 22. nóvbr. 1907, um bæjarstjórn í Hafnarfirði, lög nr. 26, 9. júlí 1909, um viðauka við greind lög, lög nr. 48, 10. nóvbr. 1913, um breytingu og viðauka við sömu lög, svo og önnur lög og fyrirsmæli, er fara í bága við lög þessi.

22. gr.

Lög þessi öðlast gildi þegar i stað.

#### Ástæður.

Ástæðan til þess, að þetta frumvarp er borið fram er aðallega sú, að svo miklar og margar breytingar hafa orðið á bæjarstjórnarlögunum upprunalegu, nr. 75, 22. nóv. 1907, bæði beinlínis og óbeinlínis vegna nýrra kosningarlaga og laga um útsvör frá 1926, sem gilda fyrir allt landið, og að þörf var á efnisbreyting, sjerstaklega um reikningshald og endurskoðun og skipun nýrra nefnda.